

Nd.

595. Nefndarálit

[78. mál]

um frv. til l. um bæjarstjórn í Kópavogshreppi.

Frá minni hl. heilbrigðis- og félagsmálanefndar.

Nefndin ræddi málið á tveimur fundum. Á fyrri fundinum mætti hreppsnefnd Kópavogshrepps að ósk nefndarinnar, og var það rætt við hana. Á síðari fundinum klotnaði nefndin um afgreiðslu málsins. Vill meiri hlutinn (PÞ, JóhH, HelgJ) láta samþykkja frumvarpið nú þegar, en minni hlutinn, undirritaður, leggur til, að umræðu málsins í háttvirtri deild verði frestað, þar til fram hefur farið leynileg atkvæðagreiðsla kosningabærra manna í Kópavogshreppi um, hvaða skipan hrepps-búar vilji hafa á stjórn sveitarfélagsins. Á slík leynileg atkvæðagreiðsla að fara fram n. k. sunnudag, þann 24. apríl.

Slík mál sem þessi munu aldrei hafa verið flutt á Alþingi, nema að ósk sveitarstjórnar og með stuðningi sýslunefndar. Hér liggur hvorugt þetta fyrir. Meiri hluti sveitarstjórnar er andvígur málinu, eins og nú standa sakir, og sýslunefnd mælir einnig gegn því, nema fyrir liggi meðmæli hreppsnefndar og óumdeilanlegs meiri hluta kosningabærra manna í hreppnum.

Enn þá er ekkert af þessu fyrir hendi. Undirskriftasöfnun, sem fram hefur farið, hefur mjög verið vefengd, bæði sökum þess hvernig undirskriftaskjalið er orðað, og vegna þess, að fjöldi fólks, sem ekki hefur kosningarrétt um mál hreppsins, hefur tekið þátt í undirskriftunum, þar á meðal 11 ára barn og allmargir útlendingar, sem ekki hafa hér ríkisborgararétt.

Minni hlutinn hefur því leitað til borgarfélagans í Reykjavík og óskað eftir nótarialvottorði um, hverjir séu á undirskriftaskjölunum, sem ekki séu á kjörskrá í Kópavogshreppi.

Sem minni hluti heilbrigðis- og félagsmálanefndar geri ég því svo hljóðandi tillögu um meðferð málsins nú:

Þar sem leynileg atkvæðagreiðsla um afstöðu kosningabærra manna í Kópavogshreppi til framtíðarskipunar sveitarstjórnarmála þar fer fram innan fárra daga, verður að teljast rétt, að umræðu verði frestað um málið, þar til sú atkvæðagreiðsla hefur farið fram og vilji kjósenda í hreppnum liggur þannig fyrir um þessi mál.

Alþingi, 18. apríl 1955.

Hannibal Valdimarsson.

Fylgiskjal I.

ODDVITI KÓPAVOGSHREPPS

Marbakka, 15. apríl 1955.

Samkvæmt ósk yðar, hr. alþingismaður, á fundi heilbrigðis- og félagsmálanefndar neðri deildar í gær, þar sem hreppsnefnd Kópavogshrepps var mætt út af fram komnu frv. til laga um bæjarstjórn í Kópavogshreppi, sendi ég yður hér með útskriftir úr gerðabók hreppsnefndar Kópavogshrepps, er sýna allt, sem þar hefur verið bókað um málið, og enn fremur önnur gögn, er varða meðferð málsins heima í héraði frá því, er það kom fyrst fram hinn 26. febrúar s. l.

Virðingarfyllt,

F. R. Valdimarsson.

oddviti Kópavogshrepps,

Hr. alþm. Páll Þorsteinsson, form. heilbrigðis- og félagsmálanefndar Alþingis, Alþingi.

I.

Útskrift úr fundargerðabók hreppsnefndar Kópavogshrepps.

Árið 1955, laugardaginn 26. febrúar, kl. 4 síðdegis, kom hreppsnefndin saman á fund að Marbakka.

Mættir voru allir hreppsnefndarmenn.

Þetta gerðist:

8. Hannes Jónsson og Jósafat Lindal lögðu fram svo hljóðandi:

„Ályktunartillaga minni hluta hreppsnefndar Kópavogshrepps um kaupstaðarréttindi til handa Kópavogshreppi:

Hreppsnefnd Kópavogshrepps ályktar að fara þess á leit við félagsmálaráðuneytið, að það hlutist til um, að flutt verði og lögfest á yfirstandandi Alþingi frumvarp til laga um kaupstaðarréttindi, bæjarstjórn og sérstakt lögsagnarumdæmi í núverandi Kópavogshreppi.“

Tillögumenn lögðu fram skriflega greinargerð fyrir tillögunni. Miklar umræður urðu um tillöguna.

Að þeim loknum bar oddviti fram svo hljóðandi dagskrártillögu:

„Hreppsnefnd Kópavogshrepps telur enga knýjandi ástæðu til þess að svo stöddu að óska eftir lagabreytingu í því skyni að gera hreppinn að kaupstað, þar sem af slíkri breytingu mundi aðeins leiða stórum aukin útgjöld fyrir sveitarfélagið, en engar teljandi réttarbætur eða bætt aðstöðu fyrir það eða íbúa þess.

En sérstaka fjarstæðu telur hreppsnefndin að setja fram slíka kröfu nú, að eins tæpu ári eftir að tvennar sveitarstjórnarkosningar hafa farið fram í hreppnum, án þess að nokkrar raddir kæmu fram í sambandi við þær um slíka breytingu, en vitanlegt, að með slíkri lagabreytingu yrðu enn að fara fram sveitarstjórnarkosningar hér, sem þá yrðu hinar sjöttu á átta ára tímabili.

Hreppsnefndin telur, að áður en horfið verði að því að breyta hreppnum í kaupstað, verði að gera verulegt átak til þess að tryggja sjálfstætt atvinnulíf í þeirri byggð, sem hér hefur risið upp, og álitur, að Kópavogshreppur eigi siðferðilega kröfu til aðstoðar af ríkisvaldsins hálfu í því efni.“

Tillaga oddvita var samþ. með 3:2 atkv. (H. J. og J. J. L.)

Fleira ekki tekið fyrir. Fundi slitið.

F. R. Valdimarsson. Hannes Jónsson. J. J. Lindal.
Ólafur Jónsson. Óskar Eggertsson.

II.

Útskrift úr fundargerðabók hreppsnefndar Kópavogshrepps.

Árið 1955, miðvikudaginn 9. marz, kl. 4 síðdegis, kom hreppsnefndin saman á fund í barnaskólanum.

Allir hreppsnefndarmenn, nema Jósafat Lindal, voru mættir. Í hans stað var mættur Sveinn S. Einarsson.

Þetta var tekið fyrir:

1. Tillaga um kaupstaðarréttindi handa Kópavogshreppi:

Oddviti skýrði frá því, að menn úr fulltrúaráðum Sjálfstæðis- og Alþýðuflokksfélaga og úr Framsóknarfélagi Kópavogs hefðu skömmu eftir síðasta hreppsnefndarfund snúið sér til félagsmálaráðuneytisins með erindi, þar sem þeir óska eftir því, að ráðuneytið láti semja og flytja frumvarp til laga um kaupstaðarréttindi og bæjarstjórn fyrir Kópavogskaupstað, og óska eftir því, að slíkt frumvarp verði lögfest á Alþingi því, er nú situr, með því að málið þoli enga bið.

Félagsmálaráðuneytið hefur síðan, þegar eftir móttöku þessa erindis, sent það sýslunefnd Kjósarsýslu til umsagnar.

Umsögn sýslunefndar liggur nú fyrir.

Las oddviti upp á fundinum ályktun sýslunefndar, sem var gerð á fundi nefndarinnar 7. þ. m. með samhljóða atkvæðum sýslunefndarmanna.

Fer hér á eftir ályktun sýslunefndar:

„Viðvíkjandi erindi félagsmálaráðuneytisins til sýslunefndar Kjósarsýslu um það, hvort Kópavogshreppur skuli skilinn frá Kjósarsýslu og gerður að kaupstað með venjulegum kaupstaðarréttindum og skyldum, vill sýslunefndin taka fram:

1. Sýslumaður Kjósarsýslu hefur upplýst, að löggæzla, skattheimta og fleiri opinber starfræksla sé erfið í framkvæmd í Kópavogshreppi við það sveitarstjórnarfyriřkomulag, sem nú er þar. Fellst sýslunefndin á, að ráða þurfi bót á þeim erfiðleikum.
2. Kjósarsýsla er ein af minnstu sýslufélögum landsins, telur aðeins fimm hreppa, og af þeim er Kópavogshreppur langfjöldmennastur. Það mundi því veikja athafnamöguleika sýslunnar verulega, ef Kópavogshreppur verður skilinn frá henni.
3. Þegar einstökum hreppum hafa með sérstökum lögum verið veitt kaupstaðarréttindi, mun framkvæðið að því eða beiðni um slíkt hafa komið frá viðkomandi hreppsfélögum, enda lýtur sýslunefndin svo á, að það sé hinn eðlilegi gangur málanna. Í þessu tilfelli liggur það ekki fyrir eins og nú standa sakir.

Ef aftur á móti fram kemur eindregin viljayfirlýsing meiri hluta sveitarstjórnar Kópavogshrepps, eða óumdeilanlegs meiri hluta atkvæðisbærra íbúa hans, um kaupstaðarréttindi fyrir hreppinn, telur sýslunefndin eðlilegt, að Kópavogshreppur fái kaupstaðarréttindi.“

Oddviti lagði síðan fram fyrir hönd hreppsnefndarmeirihlutans (F. R. V., Ól. J. og Ó. Egg.) svo hljóðandi tillögu til ályktunar:

„Fram hefur komið krafa nokkurra manna úr Framsóknar-, Sjálfstæðis- og Alþýðuflokkinum hér í hreppnum til félagsmálaráðuneytisins, að flutt verði og lögfest á þessu þingi frumvarp til laga um að gera Kópavogshrepp að kaupstað nú þegar. Þessu máli hefur aldrei verið hreyft fyrr hér í hreppnum opinberlega og almennar umræður því aldrei farið fram um það meðal hreppsbúa.

Meiri hluti sveitarstjórnar hefur með samþykkt hreppsnefndar 26. f. m. lýst sig andvigan þeirri breytingu og talið hana ótímabæra. Sýslunefnd Kjósarsýslu hefur 7. þ. m. með ályktun — samþ. með shlj. atkv. sýslunefndarmanna — lýst yfir og beint því til félagsmálaráðuneytisins, að hún telji slíka breytingu því aðeins eðlilega, að fram komi „eindregin viljayfirlýsing meiri hluta atkvæðisbærra íbúa hans“ með slíkri breytingu.

Sýslumaður Gullbringu- og Kjósarsýslu hefur hins vegar upplýst, að skattheimta, löggæzla og fleiri starfræksla hér í hreppnum af hálfu embættis hans sé orðin svo erfið við núverandi fyrirkomulag, að óviðunandi sé, og hefur sýslunefnd fallið á, að ráða þurfi bót á þeim erfiðleikum.

Með tilliti til þess, sem fram er komið í málinu samkv. framansögðu, ályktar hreppsnefnd Kópavogshrepps eftirfarandi:

1. Hreppsnefndin telur, að hæglega megi bæta úr erfiðleikum umboðsstjórnarinnar án þess að gera Kópavogshrepp að kaupstað með öllum þeim kostnaði, sem af því leiðir fyrir sveitarfélagið. Í því sambandi vill hreppsnefndin eindregið benda á þá leið, að stofnað verði sérstakt sýslumannsembætti fyrir Kjósarsýslu, og beinir því til viðkomandi ráðuneyta að bera tillögu um þessa skipan undir sýslunefnd og sveitarstjórnir í Kjósarsýslu, eins fljótt og við verður komið.

2. Verði þessi leið ekki talin fær, eða aðrar lausnir á vandkvæðum umboðsstjórnarinnar í þessu efni, á þeim grundvelli, að Kópavogshreppur haldi áfram að vera sérstakur hreppur innan Kjósarsýslu, eins og meiri hluti sveitarstjórnar og sýslunefnd óska, ákveður hreppsnefndin að leita álits kosningabærra íbúa hreppsins um þær leiðir, sem þá koma til greina. Skal sú atkvæðagreiðsla fara fram í samræmi við lög um sveitarstjórnarkosningar, en efnt til almenns borgarafundar til umræðna um málið að tilhlutan hreppsnefndar, áður en atkvæðagreiðsla fer fram.“

Sveinn Einarsson óskaði, að till. yrði borin upp í þrennu lagi, og var það gert, 1. hluti till. samþ. með 3:1 atkv. (Sv. E. sat hjá), 2. tölul. samþ. með 3:2 atkv. (Sv. E. og H. J.), 3. tölul. samþ. með 4:1 atkv. (H. J.).

H. J. óskaði bókað, að hann teldi gerræði að taka ekki við brtt. við tillöguna. Oddviti lýsti yfir út af þessu, að engar brtt. hefðu komið fram, áður en umr. var lokið. Sv. E. óskaði bókunar, en gerði ekki grein fyrir ósk sinni.

Fleira ekki tekið fyrir. Fundi slitið.

Undirskriftir.

III.

Bréf oddvita Kópavogshrepps til félagsmálaráðuneytis og dómsmálaráðuneytis.

Marbakka, 10. marz 1955.

Á fundi hreppsnefndar Kópavogshrepps í gær, 9. marz, var samþykkt meðfylgjandi ályktun, sem ég leyfi mér að senda hinu háa ráðuneyti með tilvísun til 1. liðs ályktunarinnar, þar sem hreppsnefndin bendir eindregið á þá leið, til þess að leysa úr vandkvæðum núverandi sýslumannsembættis fyrir Gullbringu- og Kjósarsýslu, að stofnað verði sérstakt sýslumannsembætti fyrir Kjósarsýslu, en tillaga um þá skipan borin undir sýslunefnd Kjósarsýslu og sveitarstjórnir í sýslunni til álita og umsagnar, eins fljótt og við verður komið.

Þessa ályktun hreppsnefndarinnar leyfi ég mér að tilkynna hinu háa ráðuneyti.

Virðingarfyllst,

F. R. Valdimarsson.

Svör bárust ekki frá ráðuneytunum.

IV.

Útskrift úr fundargerðabók hreppsnefndar Kópavogshrepps.

Árið 1955, fimmtudaginn 17. marz, kl. 5 síð., kom hreppsnefndin saman á fund að Marbakka.

Mættir voru allir hreppsnefndarmenn.

Þetta var tekið fyrir:

.....

2. Oddviti las upp bréf, sem honum hafði borizt 16. þ. m., f. h. hreppsnefndarmeirihlutans, þar sem honum og öðrum hreppsnefndarmönnum meiri hlutans er boðin þátttaka í „borgarafundi“ um kaupstaðarréttindi fyrir Kópavogshrepp, sem þrjú stjórnmalafélög í hreppnum boðuðu til, og fái þeir þrír til samans jafnan ræðutíma og fulltrúar hvers hinna þriggja stjórnmalafélaga. Oddviti las einnig upp bréf, sem hreppsnefndarmeirihlutinn í þessu máli (F. R. V., Ól. J. og Óskar Eggertss.) hefur sent fundarboðendum í dag, þar sem þeir neita að taka þessum kostum. Ólafur Jónsson bar fram svo hlj. till.:

„Í framhaldi af fyrri samþykkt hrepps. um almennan borgarafund um kaupstaðarréttindi fyrir Kópavogshrepp samþykkir hreppsnefndin að boða til slíks borgarafundar sunnudaginn 27. marz, kl. 4 síð. Tilhögun fundarins verði sú, að meiri og minni hluti hreppsnefndar hafi jafnan ræðutíma um málið, og komi þeir sér saman um fundarstjóra og fundarskóp, enda sé kjósendum veittur ríflægur tími til umræðna um málið.“

Till. samþ. með þrem samhlj. atkv.

Jósafat Línadal tjáði sig samþykkan því að halda fundinn á þessum tíma, en tekur ekki afstöðu til annarra atriða till.

H. J. kvaðst mundu mæta á fundinn að forfallalaus, en telur hann ekki rýra gildi þessa fundar, sem auglýstur hefur verið.

.....

Undirskriftir.

V.

Bréf varðandi fund þriggja stjórnmalaflokka um málið föstudaginn 18. marz 1955.

Ódagsett.

Stjórnmalafélög lýðræðisflokka þriggja, Alþýðflokksins, Framsóknarflokksins og Sjálfstæðisflokksins, í Kópavogi hafa ákveðið að efna til borgarafundar í barnaskólahúsinu á Digraneshálsi næstkomandi föstudagskvöld, kl. 20.00.

Umræðuefni: Kaupstaðarréttindi fyrir Kópavogshrepp.

Fyrir hönd fyrrnefndra stjórnmalaflokka bjóðum vér undirritaðir yður, herra oddviti, ásamt núverandi meiri hluta hreppsnefndar Kópavogs, á fund þennan. Á fundinum munuð þér og aðrir fulltrúar hreppsnefndarmeirihlutans fá til samans jafnan ræðutíma og fulltrúar hvers hinna þriggja stjórnmalafélaga, sem til fundarins boða. Á fundinum verða enn fremur frjálssar umræður.

Á borgarafund þennan bjóðum vér jafnframt hinum þremur þingfulltrúum kjördæmisins og félagsmálaráðherra, og fáið þér, herra oddviti, sem alþingismaður sérstakan ræðutíma til jafns við aðra þessa boðsgesti.

Vér munum enn fremur fara þess á leit við skrifstofustjóran í félagsmálaráðuneytinu, að hann mæti á fundinum og svari fyrirspurnum varðandi dagskrármálið, sem til hans kann að verða beint af fundarmönnum.

Virðingarfullt,

f. h. Fulltrúaráðs Alþýðflokksfélaganna
í Kópavogi,

Magnús Sigurjónsson.

f. h. Fulltrúaráðs Sjálfstæðisflokksfélaganna

í Kópavogi,

Sv. S. Einarsson.

f. h. Framsóknarfélags
Kópavogs,

Þorvarður Árnason.

Til oddvita Kópavogshrepps
Kópavogi.

VI.

16. marz 1955.

Okkur undirrituðum hreppsnefndarmönnum hefur borizt boð yðar um þátttöku í fundi, sem þér nefnið „borgarafund“ um kaupstaðarréttindi fyrir Kópavogshrepp, þar sem okkur þremur sem meiri hluta hreppsnefndar er boðið að „fá til samans jafnan ræðutíma og fulltrúar hvers hinna þriggja stjórnmalafélaga, sem til fundarins boða“, þannig að við þrír, meiri hluti hreppsnefndar, fengjum aðeins $\frac{1}{4}$ af þeim ræðutíma, sem ætlaður er til framsögu í málinu, en naumast meira en $\frac{1}{10}$ af öllum fundartímanum.

Þessum kostum hinna „þriggja lýðræðisflokka“ viljum við ekki taka.

Hreppsnefnd Kópavogshrepps hefur samþykkt að efna til almenns borgarafundar um þetta mál, áður en það verði lagt undir atkvæði allra kosningabærra íbúa hreppsins. Teljum við sjálfsagt, að þeim borgarafundi verði hagað svo, að meiri hluta og minni hluta hreppsnefndar í þessu máli verði veittur jafn ræðutími og komi þeir sér saman um fundarstjóra og fundarsköp, enda verði kjósendum veittur ríflægur tími til umræðna um málið. Að sjálfsögðu verði fundurinn eingöngu fyrir hreppsþúa.

Þá teljum við ófært að halda slíkan fund á virkum degi.

Erum við til viðræðna um þetta mál við minni hluta hreppsnefndar, og verður ákvörðun um boðun slíks fundar tekin á hreppsnefndarfundi.

Finnbogi Rútur Valdimarsson.

Óskar Eggertsson.

Ólafur Jónsson.

VII.

Til fundarstjóra á fundi þriggja stjórnmalaflokka í Kópavogshreppi 18. marz 1955.

Mér hefur sem alþingismañni verið boðið að mæta á fundi þeim, sem haldinn er í kvöld um kaupstaðarréttindi fyrir Kópavogshrepp.

Um leið og ég þakka boðið, óska ég að skýra fundinum frá því, hvers vegna ég sé ekki ástæðu til að taka því, og bið yður því að lesa bréf mitt fyrir fundamönnum.

Það mál, sem rætt verður á fundinum, kom fyrst fram fyrir tæpum þremur vikum og var þá borið fram af forustumönnum þeirra þriggja stjórnmalaflokka hér í hreppnum, sem boða til fundarins í kvöld. Mér er kunnugt um rök þeirra fyrir því, að það sé nú mesta hagsmunamál hreppsins, að honum sé breytt í kaupstað með lagasetningu. Þykir mér þetta seint séð hjá þeim, svo rækilega sem hagsmunamál hreppsins hafa verið rædd í margendurteknum sveitarstjórnarkosningum. Ég hef tekið afstöðu til þessarar tillögu sem hreppsnefndarmaður og sýslunefndarmaður, í báðum nefndum á sama veg.

Sem alþingismaður hef ég hins vegar ekki tekið afstöðu til málsins. Hefur enginn séð ástæðu til að flytja það inn á Alþingi, enn sem komið er, enda varla ástæða til, þar sem meiri hluti sveitarstjórnar og sýslunefnd hafa lýst sig andvíg því, eins og á stendur.

En á meðan ekki er kominn fram „óumdeilanlegur vilji meiri hluta kosningabærra íbúa hreppsins“ um kaupstaðarréttindi fyrir hann, eins og sýslunefnd hefur kveðið að orði, tel ég, að alþingismenn geti að skaðlausu látið málið afskiptalaust á málfundum hér í hreppnum, a. m. k. þeir, sem hvorki eru borgarar hér í hreppnum né búsettir í sýslunni.

Nú hefur mér sem hreppsnefndarmanni verið boðinn 5 mínútna ræðutími á fundinum í kvöld. Því boði hef ég hafnað ásamt tveimur meðnefndarmönnum mínum, og tel ég víst, að bréf okkar um það verði kynnt fundarmönnum af fundarboðendum. Þar sem fundarboðendur virðast ekki vilja veita okkur hreppsnefndarmönnum, sem höfum fjallað um málið, sæmilegt málfrelsi á fundinum, en ég sé ekki

ástæðu til að ræða málið sem alþingismaður á núverandi stigi þess, mun ég ekki mæta á fundinum, en bið yður, hr. fundarstjóri, að flytja honum þessa orðsendingu mína um ástæður til þess.

Virðingarfyllst,

F. R. Valdimarsson.

VIII.

Útskrift úr fundargerðabók hreppsnefndar Kópavogshrepps.

Árið 1955, 21. marz, kl. 5 síðdegis, kom hreppsnefndin saman á fund að Marbakka. Mættir voru allir aðalmenn, nema Jósafat Línal. Í hans stað var mættur Baldur Jónsson, 5. varamaður af lista Sjálfstæðisflokksins. Þetta var tekið fyrir:

1. Kaupstaðarmálið.

Oddviti lagði fram af hálfu hreppsnefndarmeirihlutans (F. R. V., Ól. J. og Ó. E.) svo hljóðandi till. til ályktunar:

„Í framhaldi af fyrri samþ. hreppsnefndarinnar um, að leitað verði álits kosningabærra íbúa hreppsins út af fram komnum kröfum um, að Kópavogshreppi verði breytt í kaupstað nú þegar með lögum, og með tilvísun til álits sýslunefndar í því máli, ályktar hreppsnefndin að láta fara fram almenna, leynilega atkvæðagreiðslu um málið og verði jafnframt leitað álits kjósenda um það, hvort þeir óski eftir samningu hreppsins við Reykjavíkurbæ.

Skal atkvæðagreiðslan fara fram skv. gildandi kjörskrá til sveitarstjórnarkosninga og í samræmi við lög um sveitarstjórnarkosningar.

Atkvæðagreiðslan fari fram sunnudaginn 24. apríl n. k., en frestir, sbr. 15. gr. 1. um sveitarstjórnarkosningar, styttr þannig, að kjörskrá verði lögð fram föstudaginn 25. þ. m., kærur út af kjörskrá komnar fram fyrir laugardag 9. apríl og úrskurðaðar eigi síðar en 16. apríl.“

Baldur Jónsson og Hannes Jónsson lögðu fram svo hljóðandi till. til rökstuddrar dagskrár:

„Með því að nú þegar liggur fyrir áskorun til Alþingis frá um 750 atkvæðisbærum íbúum Kópavogshrepps um, að hreppurinn verði á yfirstandandi Alþingi gerður að sérstöku lögsagnarumdæmi með kaupstaðarréttindum, og þar sem þessi fjöldi er yfirgnæfandi meiri hluti atkvæðisbærra íbúa hreppsins og þar með fullnægt skilyrðum þeim, sem sett voru fram í samþykkt sýslunefndar Kjósarsýslu um þetta mál þann 7. þ. m., þá ályktar hreppsnefnd að vísa frá fram kominni tillögu oddvita o. fl. um frekari atkvæðagreiðslu, þar sem það yrði aðeins til þess að tefja málið og gengi í berhögg við vilja meiri hluta kjósenda, sem óska, að breytingin veðri gerð á yfirstandandi Alþingi. Mælir hreppsnefnd nú, með tilliti til vilja meiri hluta atkvæðisbærra íbúa í hreppnum, með því, að Kópavogur verði gerður að sérstöku lögsagnarumdæmi með kaupstaðarréttindum.“

Að loknum umræðum um tillögurnar fór fram atkvæðagreiðsla um þær. Var frávísunartillaga Baldurs Jónssonar og Hannesar Jónssonar felld með 3:2 atkv. (B. J. og H. J.). Tillaga meiri hlutans samþykkt með 3:1 atkv. (Hannes Jónsson sat hjá).

Baldur Jónsson vísar til þess rökstuðnings, sem felst í frávísunartillögu, sem greinargerð fyrir atkvæði sínu.

Hannes Jónsson kveðst ekki greiða atkvæði með tillögunni með tilvísun til rökstuðnings í frávísunartillögu.

Undirskriftir.

IX.

Borgarafundur að tilhlutan hreppsnefndar, sem ákveðinn var á fundum hreppsnefndar hinn 9. marz og 17. marz, var haldinn hinn 27. marz, kl. 4 síðdegis.

Athugasemd frá Þórði Magnússyni í dagbl. „Tíminn“ 30. marz 1955.

Hr. ritstjóri.

Varðandi frásögn í blaði yðar í dag af borgarafundi í Kópavogi, sem haldinn var síðastliðið sunnudag, langar mig að biðja yður að birta þá athugasemd frá mér, sem var fundarstjóri á fundinum, að það var vegna eindreginna tilmæla minna, að engar ályktanir eða tillögur voru lagðar fram, enda lýsti ég því yfir við fundarsetningu, að ég teldi mig ekki skuldbundinn til að bera neinar tillögur undir atkvæði, þó fram kæmu.

Ég þakka bæði meiri og minni hluta, að þeir urðu við þeim tilmælum mínum, enda bærust mér engar tillögur og atkvæðagreiðsla hefði verið illfrákvæmanleg, þar sem áheyrendur voru um alla ganga, úti í bílum og í kringum húsið.

Með þökk fyrir birtinguna.

Reykjavík, 29. marz.

Þórður Magnússon.

X.

Auglýsing oddvita Kópavogshrepps um almenna, leynilega atkvæðagreiðslu um málið.

Almenn atkvæðagreiðsla kjósenda í Kópavogshreppi fer fram sunnudaginn 24. apríl n. k. Verður leitað álits kjósenda um það, hvort þeir óski, að Kópavogshreppi verði breytt í kaupstað nú þegar með lögum, og um það, hvort þeir óski eftir sameiningu hreppsins við Reykjavíkurbæ.

Kjörskrá verður lögð fram í skrifstofu hreppsins föstudaginn 25. marz. Kætur út af kjörskrá skulu komnar til oddvita fyrir laugardag 9. apríl.

Marbakka, 22. marz 1955,

oddviti Kópavogshrepps.

Fylgiskjal II.

1. Haus undirskriftarskjalanna.

Við undirritaðir kjósendur í Kópavogshreppi skorum hér með á hið háa Alþingi að gera núverandi Kópavogshrepp að sérstöku lögsagnarumdæmi, með fullum kaupstaðarréttindum, á þingi því, er nú situr, enda rýrir það ekki möguleika á sameiningu við Reykjavík síðar meir.

2. Bréf til borgarfógeta.

ALÞINGI, 14. apríl 1955.

Herra borgarfógeti, Reykjavík.

Vegna þess að það er umdeilt, hvort allir þeir, sem ritað hafa undir áskorunarskjal um kaupstaðarréttindi fyrir Kópavogshrepp, séu á gildandi kjörskrá þar og þannig örugglega atkvæðisbærir menn í hreppnum, óska ég sem alþingismaður að fá undirskriftaskjalið borið saman við gildandi kjörskrá og þannig nótarialvottað, hverjir undirskrifenda séu ekki á skránni.

Þetta er mér nauðsynlegt, af því að þetta mál liggur nú fyrir þingnefnd, er ég á sæti í. Verkinu þarf að hraða svo sem föng eru á.
Kjörskráin og ljósprentun af undirskriftaskjalinu fylgja hér með.

Virðingarfyllst,

Hannibal Valdimarsson.

3. Bréf borgarfógeta.

BORGARFÓGETINN Í REYKJAVÍK

Reykjavík, 19. apríl 1955.

Þér hafið, herra alþingismaður, með bréfi, dags. 14. þ. m., sent mér ljósprentuð áskorunarskjöl um kaupstaðarréttindi fyrir Kópavogshrepp, tölusett með númerunum 1—63, og auk þess 5 skjöl ótölusett, og óskið þér eftir því sem alþingismaður að fá undirskriftarskjölin borin saman við kjörskrá, sem fylgdi bréfi yðar, og notarialvottað, hverjir undirskrifendur séu ekki á skránni.

Leyfi ég mér hér með að senda yður notarialstaðfesta skrá yfir nöfn manna, sem ritað hafa undir áskorunina, en finnast ekki undir því nafni eða tilgreindu heimilisfangi á kjörskrá, staðfestri af oddvita Kópavogshrepps þann 16. þ. m.

Hin ljósprentuðu skjöl ásamt áminnstri kjörskrá endursendist hér með.

Kr. Kristjánsson.

Hr. alþingismaður Hannibal Valdimarsson, c/o Alþingi Íslands.

Bréfinu fylgdi svo hljóðandi notarialvottorð:

Það vottast hér með notarialiter eftir samanburð, að nöfn þeirra manna, sem hér eru skráð að framan, 224 að tölu, með þar tilgreindu heimilisfangi, finnast ekki í því endurriti af kjörskrá, staðfestu af oddvita Kópavogshrepps 16. þ. m., sem talin er gilda frá 24. jan. 1955 til 23. jan. 1956.

Notarius publicus í Reykjavík, 19. apríl 1955.

Ólafur A. Pálsson, ftr.